

**«Қ.И. Сәтбаев атындағы Қазақ ұлттық техникалық зерттеу
университеті қызметкерлерінің бастауыш кәсіподақ ұйымы»
филиалының еңбек қауіпсіздігі және еңбекті қорғау жөніндегі
заңнаманы қадағалауға, білім және ғылым саласы қызметкерлері үшін
заманауи қауіпсіз және қолайлы еңбек жағдайларын жасауға қатысуға
қоғамдық бақылау тиімділігін арттыру жөніндегі жұмысы туралы
АҚПАРАТ**

Қазақстан Республикасы Еңбек кодексінің *(әрі қарай – ҚР ЕК)* 155, 203 баптарының және Ғылым және жоғары білім қызметкерлері үшін еңбек жағдайын, жұмыспен қамтуды және әлеуметтік кепілдіктерді белгілеу жөніндегі 2023-2026 жылдарға арналған әлеуметтік әріптестік туралы салалық келісімнің негізінде Қазақстандық оқу-ағарту, ғылым және жоғары білім қызметкерлерінің салалық кәсіподағының Орталық комитет аппаратының құқықтық жұмыстар, ЕҚЖЕҚ бөлімінің бас маманы А.М.Айтжановпен 2025 жылғы 9 маусымдағы № 8 тапсырма бойынша 2025 жылдың 16-17 маусымы аралығында «Қ.И. Сәтбаев атындағы Қазақ ұлттық техникалық зерттеу университеті» КеАҚ-нда *(әрі қарай – Университет)* еңбек қауіпсіздігі және еңбекті қорғау туралы еңбек заңнамасының сақталуына тексеру жүргізілді.

2025 жылғы 16 маусымдағы жағдай бойынша университетте барлығы 2044 қызметкер бар, оның 1025-і кәсіподақ мүшесі.

ҚР ЕК-нің 203 бабының 1, 2 тармақтарына сәйкес жұмыс берушінің бастамасы бойынша және (немесе) жұмыскерлердің не олардың өкілдерінің бастамасы бойынша он бес жұмыс күнінен аспайтын мерзімде еңбек қауіпсіздігі және еңбекті қорғау жөніндегі өндірістік кеңес құрылады. Оның құрамына еңбекті қорғау жөніндегі техникалық инспекторларды қоса алғанда, жұмыс берушінің өкілдері, жұмыскерлердің өкілдері тепе-теңдік негізде кіреді.

Еңбек қауіпсіздігі және еңбекті қорғау жөніндегі өндірістік кеңестің құрамы жұмыс берушінің және жұмыскерлер өкілдерінің бірлескен шешімімен бекітіледі.

Алайда, еңбек қауіпсіздігі және еңбекті қорғау жөніндегі өндірістік кеңес құрылмаған. Еңбекті қорғау жөніндегі техникалық инспектор бекітілмеген. Тараптардың ешқайсысы, оның ішінде кәсіподақ бұл бастаманы көтермеген. Кәсіподақ өз мүшелерінің құқықтары мен заңды мүдделерінің сақталуына қоғамдық бақылауды жүзеге асыру мақсатында, сондай-ақ ЕҚЖЕҚ бойынша ішкі бақылауды жүзеге асыру мақсатында тепе-теңдік негізде өндірістік кеңестің құрамына кіруі тиіс.

ЕҚЖЕҚ талаптарын орындау жұмыс берушілер мен қызметкерлер еңбек қызметін жүзеге асыру кезінде міндетті. Жұмыс берушінің еңбек қауіпсіздігі және еңбекті қорғау саласындағы міндеттері заңмен белгіленген (ҚР ЕК 182-бабы).

Осы орайда, еңбек қауіпсіздігі және еңбекті қорғау жөніндегі өндірістік кеңес құру ұсынылды.

2023-2026 жылдарға арналған ұжымдық шартта ЕҚЖЕҚ бойынша іс-шараларды қаржыландыру туралы жұмыс берушінің міндеті қарастырылған.

Жұмыс беруші жыл сайын қолданыстағы заңнамаға сәйкес қызметкерлерді арнайы киіммен, арнайы аяқ киіммен және басқа да жеке қорғаныс құралдарымен қамтамасыз ету нормаларын ескере отырып, университетте еңбекті қорғауды жақсартуға уақытылы қаржы бөлінеді. Мысалы, 2023-2024 жылдар кезеңінде жұмыс берушімен еңбекті және денсаулықты қорғау үшін 38 441 200 теңге бөлінген. Зиянды еңбек жағдайларында жұмыс жасайтын қызметкерлерді мерзімді міндетті медициналық тексеру жұмыс берушінің қаражаты есебінен жүргізіледі.

Зиянды еңбек жағдайларында жұмыс жасайтын барлық қызметкерлерге *(қызметтік үй-жайларды тазалаушыларға демалысқа 6 күн, медициналық персоналға демалысқа 12 күн)* жыл сайынғы ақы төленетін қосымша еңбек демалысы және еңбекке ақы төлеудің жоғарылатылған мөлшері беріледі.

Университетте техникалық инспектордың болмауына байланысты Қазақстандық оқу-ағарту, ғылым және жоғары білім қызметкерлері салалық кәсіподағының «Еңбекті қорғау жөніндегі үздік техникалық инспекторы» Республикалық жыл сайынғы байқауына қатыспаған.

2025 жылы университеттің 29 қызметкері *(электриктер, сантехниктер, газ-электр дәнекерлеушілер, желдету жүйесінің маманы)* электр қондырғыларын, жылу желілерін және тұтынушыларды жылумен жабдықтау жүйелерін пайдалану кезінде еңбекті қорғау бойынша оқытудан өткен.

Өткен үш жылда еңбек қызметіне байланысты тіркелген жазатайым оқиғалар болған жоқ.

**Кәсіподақтың Орталық Комитеті аппаратының
құқықтық жұмыстар, ЕҚЖЕҚ бөлімі**